

आकाशवाणी जयपुर-अजमेर
प्रादेशिक समाचार

दिनांक 26.08.2024

समय: 18.45 बजे

- देशभर मांय कृष्ण जन्माष्टमी रो तियुंहार धार्मिक हरख अर उच्छास रे साथे मनायो जा रह्यो है।
- मुख्यमंत्री भजन लाल शर्मा कह्यो-मथुरा सूं उज्जैन सांदिपनी आश्रम जावण वाळे गेले ने श्रीकृष्ण गमनपथ रे रूप मांय राजस्थान अर मध्यप्रदेश सरकार मिल र विकसित करेली।
- राज्यभर मांय राष्ट्रीय खेल सप्ताह री आज सूं सरूआत -31 अगस्त ताई चालण वाळा सप्ताह रे चालता न्यारी-न्यारी खेल गतिविधियां रा आयोजन व्हेला।
- प्रदेश मांय न्यारी-न्यारी ठोडां माथे मॉनसूनी बिरखा रो दौर जारी- -काले उदयपुर अर जोधपुर संभाग रे दखिणी भागां मांय कटे-कटे भारी बिरखा री आस।

देशभर मांय आज जन्माष्टमी रो पर्व परम्परागत धार्मिक हरख अर उच्छास सूं मनायो जा रह्यो है। भगवान श्री कृष्ण रे जन्म रे मौके माथे ओ परब मनायो जावे है। उत्तर प्रदेश रा मथुरा अर वृंदावन मांय श्रीकृष्ण जन्मोत्सव न लेर खास उच्छास है। इण मौके माथे प्रदेश मांय भी सुंवारे सूं ही मिंदरां मांय सिरधालुआं रो तांतो लाग्योडो है। जन्माष्टमी माथे मुख्यमंत्री भजनलाल शर्मा सपत्नीक डीग मांय पूछरी का लोठा थापित मिंदर पंहुच्या, जठे वणा पूजा अर्चना कर र प्रदेशवासियां खातिर सुख समृद्धि री कामना करी। इणरेपाछे श्री शर्मा श्रीनाथ जी मिंदर मांय पूजा अर्चना करी। मुख्यमंत्री इण मौके माथे कह्यो भगवान श्री कृष्ण उज्जैन मांय महर्षि सांदिपनि आश्रम मांय शिक्षा ग्रहण करी ही। मथुरा सूं सांदिपनि आश्रम ताई जावण वाळा गेले ने राजस्थान अर मध्यप्रदेश सरकार मिल र विकसित करेला। इण श्रीकृष्ण गमनपथ माथे श्रीकृष्ण रे जीवनकाल सूं जुडी जगावां रो विकास कर्यो जावेला। मुख्यमंत्री शर्मा आज उज्जैन मांय पिरवार समेत महाकाल मिंदर मांय दर्शन कर र खास पूजा अर्चना करी।

जयपुर रा चौड़ा रास्ता थापित राधा-दामोदर मिंदर मांय दोपहरां 12 बज्यां भगवान श्रीकृष्ण रो जन्मोत्सव मणायो गयो। इण मौके माथे भगवान रो खास अभिषेक कर्यो गयो। इणरे पाछे भक्तां ने पंचामृत पंजीरी अर प्रसाद बांट र नन्दोत्सव मनायो गयो। जयपुर रा आराध्य गोविंददेवजी मिंदर मांय श्रीकृष्ण जन्माष्टमी माथे सुंवारे सूं ही भक्तिमय माहौल बण्योडो है।

जगतपुरा थापित श्रीकृष्ण बलराम मिंदर मांय श्रीकृष्ण जन्मोत्सव री सरूआत आज सुंवारे मंगला आरती सूं व्ही जकी रात 12 बज्या महाआरती रे साथे पूरी व्हेला। राजसमंद सूं म्हाणा संवाददाता बतायो के जिलेभर मांय कृष्ण जन्माष्टमी घणी धूमधाम सूं मनायी जा री है।

चित्तौडगढ जिला मांय थापित श्री सांवलिया जी मांय आज सूं दो दिन चालण वाळा मेळे री सरूआत व्ही। सांवरा सेठ रे जन्मदिन रे मौके माथे न्यारा-न्यारा कार्यक्रम राख्या जावेला। जन्मोत्सव मांय भाग लेवण खातिर कई राज्यां सूं श्रद्धालुआं रो पहुंचणो सरू व्हे ग्यो है। सांचौर मांय जन्माष्टमी माथे शोभाजात्रा राखजी ज्यी। इण रे चालता कई जगवां माथे मटकी फोड होड व्ही। बालोतरा जिला मांय कीटनोद गांव मांय कृष्ण जन्माष्टमी माथे समुद्र हिलोरने री परम्परा निभाई ज्यी। भाई बहणां रे घर पहुंच र बहन रे साथे आ रस्म अदा करी। पाली, झालावाड, बाड़मेर, जैसलमेर, नीमका थाना, भरतपुर, करौली, कोटपूतली-बहरोड, जालौर, अजमेर, सीकर, हनुमानगढ अर भीलवाडा साथे दूजी ठोडा माथे भी जन्माष्टमी माथे खास कार्यक्रम राख्या गया है।

राज्यपाल हरिभाऊ किसनराव बागडे आज जोधपुर प्रवास रे चालता न्यारा-न्यारा कार्यक्रमां मांय भाग लियो। श्री बागडे जनजातीय क्षेत्र विकास महकमा री कानी सूं चलाया जा रह्या कन्या

छात्रावास पहुंच र बालिकावां सूं बणतल करी। वणां बालिकावां ने देश रो भविष्य बताता थकां वां ने खूब पढ़ने अर जीवन मांय आगे बधने खातिर प्रेरित कर्यो। इणसूं पैल्यां राज्यपाल राजकीय छात्रावास मांय “एक पेड़ मां के नाम” अभियान रे तैत वृक्षारोपण भी कर्यो।

वठीने वणां श्री कन्हैया गौशाला पहुंच र भगवान श्री कृष्ण री विधिवत पूजा अर्चना करी। इण रे पाछे वणां गायां रो पूजन कर र वां ने हरो चारो खिलायो अर गौशाला रो जायजो कर्यो। श्री बागडे जोधपुर रा प्रसिद्ध मेहरानगढ़ दुर्ग ने भी देख्यो। वणां दुर्ग रे स्थापत्य अर शिल्प सौंदर्य री सराहवणा करता थकां ई ने इतिहास री महती सौगात बतायो।

राष्ट्रीय खेल दिवस 29 अगस्त ने मनायो जावेला। इण ने लेर प्रदेश रा न्यारा-न्यारा जिला मांय आज सूं राष्ट्रीय खेल सप्ताह री सरूआत व्ही। सांचौर जिले रा रेबारियां रा गोलियां गांव मांय खेल परिसर मांय दौड़ होड़ रे साथे खेल सप्ताह री सरूआत व्ही। वठीने जैसलमेर मांय आज प्रभात फेरी रे साथे खेल सप्ताह रो आगाज व्हयो। इंदिरा इनडोर स्टेडियम सूं हनुमान चौराहा तांई निकाळी ज्यी प्रभात फेरी ने जिला कलेक्टर प्रतापसिंह नाथावत हरी झंडी दिखा र रवाना कर्यो। 31 अगस्त तांई चालण वाळा खेल सप्ताह रे चालता न्यारी-न्यारी होड़ां राख्यी जावेला।

प्रधानमंत्री नरेंद्र मोदी लद्दाख मांय पांच नुवा जिला बणाणे रे फैसले री सराहवना करी है। एक पोस्ट मांय वणा क्हयो के ओ निर्णय चौखे प्रशासन अर समृद्धि री दिशा मांय एक खास कदम है। श्री मोदी क्हयो के जांस्कर, द्रास, शाम, नुब्रा अर चांगथांग माथे अबे बत्तो ध्यान केन्द्रित कर्यो जावेला, जिण सूं सेवावां अर मौका लोगां रे और भी कने आवेला। वणां लद्दाख रे लोगां ने बधाई दी। वठीने केन्द्रीय गृहमंत्री अमित शाह सोशल मीडिया संदेश रे मार्फत केन्द्र शासित प्रदेश लद्दाख मांय पांच नुवा जिला बणाणे रे निर्णय री सराहवना करता थकां क्हयो के मोदी सरकार लद्दाख रे लोगां रे खातिर चौखा मौका पैदा करणे खातिर प्रतिबद्ध है।

दिल्ली मंडल रेल प्रबन्धक सुखविन्दर सिंह क्हयो है के एकीकृत पेंशन योजना-यूपीएस री अनूठी विशेषतावां सूं रेलवे कर्मचारियां साथे 23 लाख केन्द्रीय कर्मचारियां ने भी फायदो व्हेला। श्री सिंह नुवी दिल्ली मांय क्हयो के नुवी पेंशन योजना रे तैत कर्मचारियां ने यूपीएस सूं जुडने रो विकल्प मिलेला। राजस्थान मांय भी केन्द्र सरकार रा यूपीएस लागू कर्यो जावण रे फैसले रो केन्द्रीय कर्मचारी भी सराहवना करी। अजमेर मंडल रा रेल प्रबन्धक आलोक अग्रवाल बतायो के मण्डल रा सात हजार सूं बत्ती रेल कर्मचारियां नेयूनिफाइड पेंशन स्कीम -यूपीएस सूं लाभ मिलेला। श्री अग्रवाल बतायो के आ योजना एक अप्रैल 2025 सूं लागू व्हेला। डाक महकमा री सहायक अधीक्षक डाक मीनू पारीक बतायो के केन्द्रीय कर्मचारियां अर वांणे पिरवार ने एकीकृत पेंशन योजना रो फायदो मिलेला।

प्रदेश मांय लारला 24 घंटां मांय केई ठोड़ां माथे हल्की सूं मध्यम बिरखा दरज करीजी। राज्य मांय सबसू बत्ती 26 सेंटीमीटर बिरखा प्रतापगढ़ जिले रा पीपलखूंट मांय दरज व्ही। आज भी राज्य रा न्यारा-न्यारा जिलां मांय रूक-रूक र बिरखा रो दौर जारी है। राजधानी जयपुर मांय केई ठोडा माथे दोपहरा पाछे तेज बिरखा व्ही। डूंगरपुर, जिला मांय केई ठोडा माथे तेज बिरखा व्ही। लगोतार बारिश सूं सोम अर जाखम नदी मांय पाणी री आवक जारी है, जिण सूं बेणेश्वर धाम टापू मांय बदल ग्यो। धाम ने जोडण वाळा तीन पुळां माथे पाणी री चादर चाल री है। झालावाड जिला मांय केई जगावां माथे हल्की बिरखा व्ही। वठीने मध्यप्रदेश मांय हो री चौखी बरसात सूं जिले री सगळी नदियां परवान माथे है। कालीसिंध अर राजगढ़ छापी बांध मांय बेसी पाणी री निकासी करी जा री है। चित्तौड़गढ़ मांय लारला दो दिनां सूं तेज बिरखा होवण सूं बांध अर तालाबां मांय पाणी री चौखी आवक व्हे री है। बाड़मेर अर जैसलमेर जिलां मांय भी आज लगोतार तीजे दिन भी बरसात रो दौर जारी रीयो। मौसम केन्द्र जयपुर रे मुजब आज उदयपुर, जोधपुर संभाग रा दखिणी भागां मांय भारी सूं अति भारी बिरखा होणे री जोर संभावना है। वठीने काले उदयपुर, जोधपुर संभाग रे दखिणी भागां मांय हवा रे साथे कठे-कठे भारी बिरखा री गतिविधियां जारी रहणे री आस है। भरतपुर, जयपुर, अजमेर, कोटा अर बीकानेर संभाग रा कुछ हलकां मांय आवता दो दिनां हल्की सूं मध्यम बिरखा रा कुछेक दौर दरज कर्या जा सके है।

सरकार वित्त मंत्रालय सूनू 46 हजार सूनू बत्ती रूप्या री वित्तीय सहायता देणे री दावेदारी करणे वाळे लिंक ने फर्जी बतायो है। एक सोशल मीडिया पोस्ट मांय सूचना अर प्रसारण मंत्रालय री फेक्ट चेक इकाई इण फर्जी खबर रो भंडोफोड कर्यो है। संदेश प्राप्त करण वाळा ने एक फर्जी लिंक रे जरिये आपरी सगळी जाणकारी देणे रो कह्यो गयो है। मंत्रालय इण तरह री कोई भी दावेदारी रो खंडन कर्यो है अर इण प्रकार रा संदेशां ने फर्जी बतायो है।

भारतीय रिजर्व बैंक रा गवर्नर शक्तिकांत दास कह्यो है के जी.ई.एम, यू.पी.आई अर यू.एल.आई री नुवी तिकडी भारत रे डिजिटल भुगतान मांय एक क्रांतिकारी कदम है। वणां कह्यो के रिजर्व बैंक कानी सूनू प्रवर्तित यूनिफाइड लेंडिंग इंटरफेस-यूएलआई प्लेटफॉर्म भारत मांय ऋण प्रक्रिया ने सरल बणावेला। श्री दास बैंक रा 90 बरस पूरा होणे माथे डिजिटल सार्वजनिक अवसंरचना अर उभरती प्रौद्योगिकियां माथे वैश्विक सम्मेलन मांय बोल रह्या हा। यूएलआई ने लारले बरस प्रायोगिक परियोजना रूप मांय सरू कर्यो गयो हो। वणां कह्यो के ई ने बेगो ही पूरे देश मांय लागू करयो जावेला।

काठमांडू मांय आज दक्षिण एशियाई फुटबॉल संघ-सैफ री अंडर-20 होड रे सेमीफाइनल मांय भारतीय पुरुष राष्ट्रीय टीम रो बांग्लादेश सूनू मुकाबलो व्हेला। इण होड मांय भूटान अर मालदीव माथे जीत हांसिल कर र समूह-बी मांय शीर्ष स्थान माथे री भारतीय टीम सेमीफाइनल मांय पहुंची।